

**“ТАСДИҚЛАНГАН”**

**“Yo’lqurilish” АЖ**

**ягона акциядорининг**

**2021 йил “ 3 ” май даги**

**5 – сонли Қарори**

**6-илова**

**“YO’LQURILISH”**

**АКЦИЯДОРЛИК ЖАМИЯТИ**

**ТАФТИШ КОМИССИЯСИ ТЎҒРИСИДАГИ**

**НИЗОМИ**

<

## МУНДАРИЖА

1. Умумий қоидалар.
2. Тафтиш комиссияси аъзоларини сайлаш.
3. Тафтиш комиссиясининг фаолият кўрсатиш тартиби.
4. Тафтиш комиссиясининг ҳуқуқ ва мажбуриятлари.
5. Тафтиш комиссияси йиғилишлари.
6. Яқуний қоидалар.

## **1. УМУМИЙ ҚОИДАЛАР**

1.1. Мазкур Низом “Yo’lqurilish” акциядорлик жамияти (кейинги ўринларда – Жамият) тафтиш комиссияси мақомини белгилайди ва ва унинг ишини, комиссия аъзоларни сайлаш тартибини, шунингдек ҳар бир аъзонинг ҳуқуқ ва мажбуриятларини белгилайди.

1.2. Мазкур Низом “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикаси Қонунига, Корпоратив бошқарув кодекси (31.12.2015й. 9-сон) талабларига ва Жамият уставига мувофиқ ишлаб чиқилган.

## **2. ТАФТИШ КОМИССИЯСИ АЪЗОЛАРИНИ САЙЛАШ**

2.1. Жамиятнинг молия-хўжалик фаолиятини назорат қилиш учун ягона акциядор томонидан бир йил муддатга 3 (уч) кишидан иборат таркибда тафтиш комиссияси сайланиши мумкин.

2.2. Жамият тафтиш комиссияси аъзоларига доир малака талаблари ягона акциядор томонидан белгиланади. Айтиб ўтиш керакки, бир шахс айтиб ўтилган тафтиш комиссияси таркибига кетма-кет уч мартадан ортиқ сайланиши мумкин эмас.

2.3. Жамият тафтиш комиссиясининг аъзолари бир вақтнинг ўзида жамият Кузатув кенгашининг аъзоси бўлиши, шунингдек айтиб ўтилган тафтиш комиссияси билан шартномаси (контракт) бўйича ишлаши мумкин эмас.

2.4. Тафтиш комиссияси аъзосига берилган ваколат муддати давомида у ўз фаолиятини тўхтатмоқчи бўлса, Кузатув кенгашини ўз фаолиятини тўхтатишдан бир ой олдин огоҳлантиради. Ушбу ҳолатда ягона акциядор қарори билан тафтиш комиссияси аъзосини алмаштириш амалга оширилади.

## **3. ТАФТИШ КОМИССИЯСИНING ФАОЛИЯТ КЎРСАТИШ ТАРТИБИ**

3.1. Жамиятнинг молия-хўжалик фаолиятини текшириш тафтиш комиссиясининг, ягона акциядор, Кузатув кенгашининг ташаббусига кўра талабига кўра Кузатув кенгашини олдиндан хабардор қилиш йўли билан бир йиллик ёки бошқа давр ичидаги фаолият яқунлари бўйича амалга оширилади.

3.2. Жамиятнинг молия-хўжалик фаолиятини текшириш яқунларига кўра жамиятнинг тафтиш комиссияси хулоса тузади, бу хулосада:

➤ жамиятнинг ҳисоботларида ва бошқа молиявий ҳужжатларида кўрсатилган маълумотларнинг ишончлилигига доир баҳо;

➤ бухгалтерия ҳисобини юритиш ва молиявий ҳисоботни тақдим этиш тартиби бузилганлиги, шунингдек молия-хўжалик фаолияти амалга ошириляётганда қонун ҳужжатлари бузилганлиги фактлари тўғрисидаги ахборот кўрсатилиши шарт.

3.3. Жамиятнинг молия-хўжалик фаолиятини текшириш якунларига кўра жамиятнинг тафтиш комиссияси хулосасида кўрсатилган ахборотни ўз ичига олган хулоса ягона акциядорга киритилади.

3.4. Жамият тафтиш комиссиясининг ёзма талабига кўра жамият ижроия органида мансабни эгаллаб турган шахслар жамиятнинг молия-хўжалик фаолияти тўғрисидаги ҳужжатларни тафтиш комиссиясига тақдим этади.

3.5. Тафтиш комиссияси ўз вазифаларини бажараётганда қуйидаги фаолиятларни амалга оширади:

➤ бухгалтерия ва статистика ҳисоботларининг юритилишини амалдаги меъёрий ҳужжатларга мослигини таҳлил қилиш;

➤ жамиятнинг ишлаб чиқариш ҳамда хўжалик-молиявий фаолиятини қонунчиликка ва бошқа меъёрий ҳужжатларга амал қилинишини текшириш;

➤ жамиятнинг молиявий ҳолати, тўлов қобилияти, активлар ликвидлигининг таҳлили ва жамият иқтисодий ҳолатини яхшилаш чораларини топиш бўйича жамият бошқарув органларига таклифлар бериш;

➤ хизмат ва маҳсулотлар учун тўланаётган тўловларнинг тўғри ва ўз вақтида тўланишини, бюджет ва бюджетдан ташқари тўловларни, акциялар бўйича дивидендларни ҳисоблаш ва тўлаш ҳамда бошқа масъулиятларнинг таъминланишини назорат қилиш;

➤ жамият балансининг тўғри тузилишини, солиқ инспекциясига ҳисоботларни, статистика ва давлат бошқарув органларига берилаётган ҳисоботларнинг тўғрилигини текшириш;

➤ молия-хўжалик фаолияти амалга оширилаётганда қонун ҳужжатларига риоя қилинаётганлигини текшириш.

3.6. Тафтиш комиссиясининг хулосасисиз ягона акциядор бухгалтерия балансини тасдиқлаши мумкин.

3.7. Режадан ташқари тафтишлар тафтиш комиссияси томонидан Кузатув кенгаши аъзоларининг кўпчилик овози билан қабул қилинган қарор бўйича амалга оширилади.

#### **4. ТАФТИШ КОМИССИЯСИНИНГ ҲУҚУҚ ВА МАЖБУРИЯТЛАРИ**

4.1. Тафтиш комиссияси ўтказган текшириш натижалари бўйича хулосани жамият ягона акциядорига ҳамда Кузатув кенгаши аъзоларига хабар қилади.

4.2. Тафтиш комиссияси ўз фаолиятини амалга оширишда қуйидаги ҳуқуқларга эга:

➤ акциядорлик жамияти бошқарув органларидан, унинг бўлимларидан, мансабдор шахсларидан тафтиш комиссияси фаолияти учун зарур бўлган ҳужжатларни талаб қилиб олиш. Сўралган ҳужжат

ва материаллар ёзма сўров берилган кундан кейин тафтиш комиссиясига 3 кун давомида тақдим этилиши керак;

➤ акциядорлик жамиятининг молиявий, ҳуқуқий, ишлаб чиқариш-хўжалик соҳаларида жиддий хатоликлар аниқланганда, жамият манфаатларига зиён етиш хавфи туғилганда ваколатли шахслардан жамият Ижроия органи раиси масъул ходимлар билан оператив мажлис ўтказишни, Кузатув кенгашининг мажлисини чақиришни талаб қилиш;

➤ акциядорлик жамиятининг молиявий, ҳуқуқий, ишлаб чиқариш-хўжалик соҳаларида жиддий хатоликлар аниқланганда, жамият манфаатларига зиён етиш хавфи туғилганда тафтиш комиссияси аъзоларининг яқдиллик овозлари билан ягона акциядорлар йиғилишини чақиришни талаб қилиш;

➤ эгаллаб турган лавозимидан қатъий назар акциядорлик жамиятининг ишчи ходимларидан тафтиш комиссияси ваколатидаги масалалар бўйича шахсан тушунтириш беришларини талаб қилиш;

➤ шартнома асосида ўз ишига акциядорлик жамияти штат жадвалида бўлмаган мутахассисларни жалб қилиш;

➤ жамият тафтиш комиссияси қонунчиликка асосан бошқа ҳуқуқларга ҳам эга.

4.3. Тафтиш комиссияси ўз фаолиятини амалга оширишда қуйидаги мажбуриятларга эга:

➤ Ягона акциядорларга, Кузатув кенгашига, ижроия органига амалга оширилган тафтиш ва текшириш натижаларини ёзма шаклдаги ҳисоботлар, маърузалар ва хабарлар шаклида ўз вақтида етказиш;

➤ тафтиш комиссияси аъзолари ўз вазифасини бажариш давомида эга бўлган тижорат сирлари ва конфеденциал (сир) маълумотларни сақлаш ва овоза қилмаслик;

➤ мансабдор шахслар томонидан ўз мансабларини суистеъмол қилиши ёки акциядорлик жамияти манфаатларига реал хавфлар пайдо бўлган ҳолатда ягона акциядор йиғилишини чақирилишини талаб қилиш;

➤ Кузатув кенгашига ягона акциядор йиғилишини чақирилишидан камида 10 кун кечиктирилмасдан йиллик бухгалтерия баланси ва молиявий ҳисоботи бўйича ҳулоса бериш;

➤ жамиятда аффилиланган шахслар билан тузилган битимлар ёки йирик битимлар мавжудлиги, шунингдек қонун ҳужжатларининг ва жамият ички ҳужжатларининг бундай битимларни тузишга доир талабларига риоя қилиниши тўғрисидаги ҳулосани йилда бир марта кузатув кенгашининг мажлисига олиб чиқиш.

## **5. ТАФТИШ КОМИССИЯСИ ЙИГИЛИШЛАРИ**

5.1. Жамият тафтиш комиссиясининг раиси унинг ишини ташкил этади, комиссия мажлисларини чақиради ва уларда раислик қилади, мажлисларда баённома юритилишини ташкил этади, Кузатув кенгаши мажлисларида ва ягона акциядорга маслахат овози билан иштирок этади.

5.2. Жамият тафтиш комиссиясининг раиси бўлмаган тақдирда унинг вазифасини комиссия аъзоларидан бири амалга оширади.

5.3. Тафтиш комиссияси йиғилишлари белгиланган режа бўйича шунингдек тафтиш бошланиши олдидан ва текшириш натижалари бўйича ўтказилади.

5.4. Тафтиш комиссияси аъзоси тафтиш комиссиясининг кечиктириб бўлмайдиган қарорларини талаб қилувчи ҳолатлар аниқланганида тафтиш комиссиясининг фавқулотдаги мажлисини чақиришни талаб қилиши мумкин.

5.5. Тафтиш комиссияси мажлисларини ўтказишда 50 фоиздан кам бўлмаган аъзолари ҳозир бўлганида мажлис ваколатли ҳисобланади.

5.6. Тафтиш комиссиясининг ҳар бир аъзоси бир овозга эга. Тафтиш комиссиясининг далолатномалари ва ҳулосалари йиғилишда ҳозир бўлганларнинг оддий кўпчилик овози билан тасдиқланади. Овозлар тенг бўлган ҳолатларда тафтиш комиссияси раиси овози ҳал қилувчи овоз ҳисобланади.

5.7. Тафтиш комиссияси аъзоси тафтиш комиссияси қарорига рози бўлмаган ҳолатда ўзининг норозилигини йиғилиш баёнида акс эттиришни ва ушбу ҳолатни жамият ижроия органи, Кузатув кенгаши ва ягона акциядорга етказишни талаб қилишга ҳақли.

5.8. Тафтиш комиссияси мажлисда муҳокама қилинган масалар бўйича тафтиш комиссияси аъзолари томонидан баённома юритилади, баённома комиссия аъзолари томонидан имзоланади.

5.9. Тафтиш комиссияси аъзоларига меҳнатга ҳақ тўлашнинг энг кам миқдорининг 3 баравари миқдорида ҳар ойда ҳақ тўлаб борилади.

## **6. ЯКУНИЙ ҚОИДАЛАР**

6.1. Мазкур Низом ва унга киритиладиган ўзгариш ва қўшимчалар ягона акциядорнинг қарори билан тасдиқланади.

6.2. Низомга ўзгартириш ва қўшимчалар Жамият кузатув кенгаши аъзолари ва ижроия органи раиси таклифига асосан киритилади.

6.3. Агар мазкур Низомнинг алоҳида моддалари амалдаги Қонунга ва/ёки Жамият Уставига зид келса, ушбу моддалар ўз кучини йўқотади ва Низомга тегишли ўзгартиришлар киритилгунга қадар ушбу моддалар билан тартибга солинадиган масалалар Ўзбекистон Республикаси қонунчилиги ва/ёки жамият Устави нормалари билан тартибга солинади.